



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Russia deputy defence minister Ivanov-i sübokrem agiba aitsü

India tetsür football team coach mapa abentsü Langam renema lir



VOL. XXI ISSUE NO. 192 (ADOK 192) DIMAPUR YANGTEPNÜ (THURSDAY) RONGCHII (APRIL) 25, 2024 ₹ 5.00

AYO-i DCCI, CCCTA aser KCCI pusemer

Dimapur, April 24, 2024 (TYO): Angami Youth Organisation (AYO)-i DCCI, Chümoukedima Chamber of Commerce and Trade Association (CCCTA) aser KCCI ajanga ayongba mokdang nung pusema nungitba metetdaksüogo. Naga Political Groups (NPGs) aser ozüing alema inyakertemi tashiyim agi sen meshiba aser tax onsara saruba

ajanga shishilembartem kanga timtembaji nisung ajaki meteta lir ta AYO president Kesosul Christopher Ltu aser vice president Dievi Yano nati ashi. Naga yimten teloktemi ozüing alema tax saruba aser tashiyim agi sen meshiba khuret ajanga sensotem timtemer. Anungji public aser shishilembar ajaki iba külem khuret pusema nungittsü ayongzüker, ta AYO-isa ashi.

GPRN/NSCN-i ketdangpur tasen pusema nungiter

Dimapur, April 24, 2024 (TYO): April 24, 2024 nü GPRN/NSCN National Tatar Hoho Session agiogo aser idangji ketdangpur tasen pusema nungittsü bangjemtepogo. National Tatar Hoho Session ajanga Gen. (Retd.) M.B. Neokpao Konyak, President, GPRN/NSCN aser Alezo Venuh, Ato Kilonser, GPRN/NSCN na lenisüba pusema nungittsü lemtet.

Iba senden ya Tatar Hall, Council Headquarters (CHQ), Naga Unification Camp, Khehoyi nung agia liasü. National Tatar Hoho Session-isa India sorkar den Working Committee, Naga National Political Groups (WC, NNPGs) kübok telemteba ka magi tashi inyaksü collective leadership nem tashi agütsüogo, ta MIP, GPRN/NSCN sangdong ka nung ashi.

Mongsenyimti Baptist Arogo-i Kotakrati kenten sentong agi

Mokokchung, April 24, 2024 (TYO): Mongsenyimti Baptist Arogo (MBA)-i ayongzüka 'Kotakrati' ta sür kentenmenü sentong tulu ka Bodbar aonung par tenla kidang kanga longsoa kaogo. Sentong nung Mongsenyimti nung alirtem dang masü Mokokchung, Kohima aser Dimapur nungi par yimer ken zülur aser ken atenertem aika arua shilem tajung agia liasü. Iba sentong ya tongtibangsa MBA nung kenten asentenshi adokdaksüba den ken ajanga T s ü n g r e m sentsü wangshidaksütsü nükjiding nung ayongzüka lir, ta Mongsenyimti Baptist Arogo Music Director, Imotemjen Ozükümi metetdaksü. Takum 'Kotakrati' nükjidingji par yimer aika nem Tsüngremi ken zülutsü aser atentsü sempet

tajung agüja lir, anungji, itemji asentenshidakja iba sentong ajanga ajungshitsü, sempet temi adokdaksütsü aser alima nema metetdaksütsü tejangraba lir, aser taküm iba sentong nung par yimeri züluba/mejemba ken temeja dang aten, ta paisa metetdaksü. MLA & Advisor, Tongpang Ozüküm-i sentong nung tayongzüka o tatsüka jembidang, Mongsenyimti nung nem kentenmenü luyim tsütsü sempet moaja lir, aji oda, tangazükba ya tatembang maka ojen oa kar ta bilema sempetji amshira, asenok asoshi temoatsüba asütsü ta ashi. Iba sentong akaba ajanga tang dang nungi kechisarena nung tajungba aotsü nükla yur tangatetba aser temulungtetba alitsü asoshi paisa ayongzüksen.

Kohima nungi pur aoba aayanger ka kümzük



Dimapur, April 24, 2024 (TYO): Kohima nung kisüba mapa nung aayanger ka pur aoba Kohima aser Phek police temi kümzükogo. April 22 nü Kohima nungi aayanger pur aser yasüing Pfütsero nungi kümzük. Kohima SDPO (North)-i anir police telok kati Phek Police teyari agia iba mapa inyaka liasü. April 22, 2024 nü mejangja

nisung aayanger ka ki yanglutsü ta shia pur ao. Iba sülen pa chioktsü atema parnokki Rs 5 lakhs meshi. Iba osang angazükba sülen police-i technical input, teyari agia nisung ana apu. Tena ya a Naga Political Group ka nung züngsem lir. Iba dak sendakba nung North Police Station nung ken o ka benokogo aser maneni bushisüngdang südar.

DCCI-i mokdang ayongba agitsü; KCCI-ia Kohima nung ayongzüker

Dimapur, April 24, 2024 (TYO): Dimapur Chamber of Commerce and Industry (DCCI)-i April 26 nü shishilembaba ajunga mokdangtsü ayongzüka ama agitsü nenshia metetdaksüogo. Naga political groups-i shishilembartem nem timtem agütsüba anema iba sentong ya ayongzüker.

tajung ka maliasü aser iba jagi onoki shishilembabaren ajunga shibangtsü ta DCCI president, Akashe Zhimomi-i ashi. Iba mokdang ya shishilembartem atema dang lir aser garitem senzütsü aser tanga establishments lapoktsü ta paisa ashi. Külen, Kohima Chamber of Commerce and Industry (KCCI)-ia April 26, 2024 anepdang 6:00 ako nungi nikongdang 6:00 ako tashi mokdangtsü osang metetdaksüogo. Iba lemtet ya KCCI-i Dimapur Chamber of Commerce and Industry (DCCI) pusema nungitba sayua agiba lir. Shishilembartemi timtem ajuruba atema KCCI-ia iba mokdang ayonger anungji züngsemtem, civil societies aser public-ia yariteptsü mepishir ta parnokki metetdaksüogo. Ajisüaka, medical nungdakattem aser district-i aruba aintsüinertem asoshi iba mokdang kübok Pharmacies,

Hotels aser Bakeries madentsü ta KCCI-i ashi. Petroleum Dealers' Association of Dimapur, Niuland and Chümoukedima (PDADNC)-ia DCCI-i mokdang ayongba sülen anidakba osang metetdaksüogo. Naga Political groups-i shishilembartem dang tax onsara sarur, amokmerener, jaoker aser timtem agütsür. Item inyakyim ya administration aser police-i meteta dang inyaker saka inyakyim noktangtsü atema tansütsüsa mapa kecha meinyaker, ta PDADNC-i sangdong ka nung ashi. Tarutsü nung timtem tuluba majurudang sorkari iba tensa ya azüoktsü mepishir ta parnokkisa ashi. PDADNC-isa Dimapur, Niuland aser Chümoukedima nung aliba petroleum company temi DCCI ajanga ayongba mokdang nung shilem agitsü ayongzüka den public dang timtem aremtsü mepishia metetdaksüogo.

LTM lokti senden Yaongyimti nung amung



Yaongyimti yimtak Langpangkong Tzükong Mungdang 44 buba lokti senden amungba mamatsü atema azüngba Nüngshilung tsüngdang LTM mendenpurtem den Advisor & MLA Wb. Tongpang Ozüküm, Advisor & MLA Wb. A. Pangjung Jamir aser CIC Wb. I. Meyionen Jamir nungertem kulemi agiba noksa ka yangi angur. (April 23, 2024).

terenlok mapatem takok ngudaksütsüla, " ta tayongzüka o ka metetdaksü. Langpangkong yabo tangar dang nungi balaka, kechiyong iba tzükong yabo Ao, Phom aser Chang kin asema küma lir, anungji iba telongiem ya meraksai putepa lia aotsü atema teti ajungshiteptsüla ta paisa ashi. Iba kasa LTM lokti senden nung Tuli Assembly Constituency nungi adoksang MLA aser Fishery & Aquatic Resources department nung Advisor Wb. A. Pangjung Jamir-ia tzükong purtem ayongzüka jembidang, Langpangkong tzükong aser temeket nung terenlok mapa aika inyaka aotsü sentong lir, anungji itemji takok angutsü atema nübertem longjemmer yariteptsü nungdaker ta metetdaksü. Iba mungdang nung Yaongyimti nung Nagaland Housing & Mechanical minister Wb. P. Bashangmongba Chang-ia mungdangsanger ajak den tepela salem o lemsatep. Iba lokti senden nung ano tang nungi LTM anitsü atema mendenpur tasentem rongnung tir asütsü atema Wb. N. Watitoshi (Wameken), tadong tir Wb. Limasangwa (Unger), tongti zülur Wb. R. Nükshi Longkumer (Yaongyimsen), Repsem zülur Wb. Moatoshi (Akhoya), Senotsü Ketdangser, Wb. Rongsenshilu (Unger) aser Kimen Wb. S. Temsü Pongen (Chuchuyimlang) nungertem shimogo.

Mokokchung, April 24 (TYO) : Langpangkong Tzükong Mungdang (LTM) 44 buba lokti senden Yaongyimti yimtak yashi April 23 nü Langpangkong yimtsüng shia nungi putu yimsüsür, tebu tedi aser lenirtem adenshia ' Sümedem' omen nung shisalemsatapa mungogo. Iba lokti senden nung tongti o jembir, Chief Information Commissioner, Wb. I. Meyionen Jamiri jembidang, tanü putu nung yimten tashi raktepba ajanga nübertem kanga akoksar, anungji ibaji meteta nübertemi yimten yimsüsürtem shimba maparen nung kanga shisa akatsüla aser pei lima ajangzüksüsa teindang shisatsü agi inyaksüla ta tayongzüka o tongtibang ka agütsü. Paisa Langpangkong

nungertemi nübertem lenmang aisü nung ajangzüksü ta meteta Dikhu Hydro Electricity Project ya takok angutsü atema kidanger Phom aser Konyak yimten den jembitsü ajungshi. Ano, iba denji Tuli college ya government college akümtsü asoshi külemi merangtsü nungdaker ta metetdaksü. Iba kasa lokti senden nung Water Resources department nung Advisor aser MLA Wb. Tongpang Ozükümi jembidang, Langpangkong ya Tsüngremi moatsüba Industry akümtsüba lima ka lir, yangi micro-small industry aika lapoka odagi aser Tuli tashi train yakta atua jajatsü inyaktep dagi. Anungji Langpangkong nungertemi telongjem nung nisung ajak asoshi ajangzüksüsa item

Nagaland Angh-i ICFAI University Convocation sentong moatsü



Bodhbarnü Sovima yimdak ICFAI University indang Convocation sentong nung Nagaland Angh La Ganesan-i jembidang tangokba noksa ka yangi angur.

Dimapur, Rongchii/April 24 (TYO): Chümoukedima district kübok Sovima yimdak aliba ICFAI University indang Convocation sentong ka University auditorium nung April 24, 2024 nü alidang Nagaland Angh La Ganesan-i tongti tesemdanger ama moaja liasü.

Iba sentong nung pai jembidang lanur scholar 414-i takok anguba aser gold medallists 32 aser Certificate of Merit angurtem nem tenüngsang agüja liasü.

Tarutsü nung rangloker reprangra, job market kanga kera ainer, anungji graduate asüba kaketshir temi anir iba temelenshi arudaktsüsüla, ta pai ashi.

Pai kaketshirtem dang entrepreneurship nung tetsüng ajemoktsü aser mapa bushir masü saka mapa agütsür ka-ka akumtsü ajungshia liasü.

Dangari memeteti aliba lenmang nung jajang, startups tüzükang aser tanü tensa nung nüngdakba solutions bener arur ka-ka asütsü merangang. Nenoki angazükba shisaliok

yagi alima nung odang alitsüba masü saka shisadanga yangershtsü nenok renemja lir, ta Nagaland Angh-i ashi.

Graduate aser tashi-temeteter ka ama kija aser lokti asoshi mapa tajung inyaktsüla, aser arok ajungtsü atema tekolok-shisatsü aser sempet amshitsüla, ta ashi.

Wadang balala nung ajemokaka pei temulungsentsü shidak alitsüla, dangar den shisatsü lemsateptsüla, ta Angh La Ganesan-i ashi.

Shisaliok ya tashi tulu aketba hadir ka lir, koba ajanga kija aser lokti nem tashi balaka agütsür. Anungji pei wadang nung süshia, pei takum nung süshia, dangari akumtsüboa rangloksüla litettsüla. Aser yangji ochishiba, temulungsentsü teindang aser ochi nung tasü ita nokdakba dena lir, ta ashi.

Pai kaketshirtem dang volunteer mapa inyaktsü, lokti inyaksangshi nung shilem agitsü aser inequality, environmental sustainability mesüra health care tsütsü tebilemtsü balala adoka aliba koktetsü asoshi maparen

balala nung shilem agitsü ajungshia liasü.

Tarutsü nung asen lima rongsenketzüng aser loktiliba nenok ket nung lir, anungji yimya tajung amshia lokti aintsü asoshi bendanga agütsür inyaktsü imlaa atar, ta pai ashi.

Asenoki 2047 tashinung 'Vikshit Bharat' dak rangloker inyaksangshir asünung, nenoki iba nükjidong tongtetba nung tongti shilem agitettsü aser asen linük terenlok aser yimchiyimjung leni anitsü nenok dak teimla lir, ta Angh La Ganesan-i ashi.

Paisa kaketshirtem dang tasü ita tejangraba nung tajung inyaktsü asenok ajaki mera agiti, ta ayongzük.

Iba sentong nung Angh den tongtipang nisungtemi temo milen tsükloka liasü aser Vice Chancellor ajanga pela agizükba o jembia liasü.

Iba sülen Chancellor Dr. VRK Prasad-i jembi aser Academic Council indang mendenpubai degree balala indang certificate agüja liasü aser Angh aser tongtipang nisungtemi medals agüja liasü.

Mkg. nung Ayushman Bharat indang awareness agütsü



Dimapur, Rongchii/April 24 (TYO): Mokochung district nung health professionals aser health facilities atema Ayushman Bharat Digital Mission nung awareness aser registration sentong ya CMO Conference Hall, Mookochung nung April 24, 2024 nü Ayushman Bharat Digital Mission (ABDM) ajanga ayongzükba liasü.

Iba sentong nung Ayushman Bharat Digital Mission indang rateta jembidang, Dr. Nyanthung Kikon, SNO ABDM Nagaland

ajanga ashiba agi, Ayushman Bharat Digital Mission ya linük nung digital health infrastructure ka kuma lungjemdaktsüsü asoshi nüngdakba teyari agütsüsü atema lir.

Anungji ABDM ecosystem nung healthcare agütsür balala den nüburtem Ayushman Bharat Health Account (ABHA) number ajanga sendakteptsür, ta ashi.

Iba training nung Mokochung district kübok aliba doctor aser nurse tem dena liasü aser parnok nem

nüburtem, Healthcare professional registry (HPR), Health Facility Registry (HFR) aser ABDM initiatives asoshi ABHA mapa kuma inyaktsü indang angatetdakja liasü.

Iba training tatemi Healthcare professional registry (HPR) & Health Facility Registry (HFR) atema on-site registration agia liasü.

Iba sentong nung training agütsür ya Dr. S.Yingnei Konyak, JD (Admin) aser Neipukhriezo Tetso, JD (IT), ABDM PMU team liasü.

Khar Kaketshir Telongjem Dimapur lokti senden ayonger

Dimapur, Rongchii/April 24 (TYO): Khar Kaketshir Telongjem Dimapur (KKTD) 47 buba lokti senden April 27, 2024 anepdang 10:00 ako nungi tanzüka KKTD kimen I Watitemjen, Indisen kidang

amentsü, ta sangdong ka ajanga ashi. Iba senden nung KKTD sanenluden aser kaketshir züngsem ajak medema arua adentsü metetdaktür, ta sangdong ajangasa ashi.

World Book Day nung Assam Rifles-i kakets aser stationary agütsü



Dimapur, Rongchii/April 24 (TYO): Nübur aser shisalak terenlok atema maneni meranga inyakba nung shilem ka ama Assam Rifles temi World Book Day nung Phek district kübok Government Middle School, New Thewati nung azünger kaketshir nem kakets lema agüja liasü.

Iba mapang Assam Rifles temi iba school nung azünger kaketshir 90 nem stationary aser kakets agüja liasü. Assam Rifles temi iba ama mapa tajung inyakba ngua nüburtemi pelaba lemsatep, kong tesayur aser kaketshirtem tejangraba tulu nung pelashishia shilem agia liasü.

Dimapur Police-i ashikülak mapa inyaker asem apu



Dimapur, Rongchii/April 24 (TYO): Dimapur nung alirtem mapang talangka timtendakja MRP fraud/tashiyim amshia senotsü meshir telok ka Dimapur Police-i April 23, 2024 nü pua liasü.

ya news channel tem den lemsatep aser parnoki meshiba sen magütsüra item video ya news channels/social media nung prokshitsü amokmerena liasü.

Police-i apurtem ya arishi küm 35 tain SS Tatar NSCN (IM) nungi Khekato Zhimomi, arishi küm 29 tain SS Leacy NSCN (IM) nungi Khukivi Aye aser Sematilla nung Pan Shop kibur Rabi Dey liasü, ta Dimapur Police ajanga sangdong ka nung ashi.

Bushisüngdangba mapang Rabu Dey, Pan Shop Vendor nem iba ama ashikülak mapa inyakba atema Khekato SS Tatar NSCN (IM) ajanga taa agütsüba putet. Ajidang masü Rabi Dey yagi online (Flipkart) nungi Price Tagging Devices pongu den & MRPTags aliba putet, ta Dimapur Police ajanga ashi.

Pua aliba scammer tem yagi Rabi Dey den külemi teshimtet dokan kar nung miima MRP Tagging Devices amshia MRP Tags inoktsüsü aser NSCN (IM) züngsem temi item dokan meita oa MRP tag shidakba indokba aser MRP tali zülua aliba atema senchi chia aru, ta ashi.

Bushisüngdangba mapang par dokan nungi Price Tagging Device ka aser amshir aliba Price Tagging Devices asem ngutet aser iba oset ya ka ano April 27, 2024 nü pa ket tongtsüsü aliba putet.

Iba mapang dokan kibur kar pua bener ao mesüra parnok indang Camp temi jaoka merenshi aser price tagging devices amshi ta nangzükba video tem yanglua liasü. Iba sülen parnoki item video

Iba tasa tamajung ya amshia parnoki Dimapur nung dokan kibur aika dang nungi sen jenti meshir liasü, ta ashi. Iba maparen dak sendakba nung East Police Station aser West Police Station nung tapet ozüng kübok ken o zülüoka bushisüngdangba mapang lir, ta Dimapur Police ajangasa ashi.



April 24, 2024 nü Thiruvananthapuram nung All India Congress Committee (AICC) Tir Mallikarjun Kharge aser party lenir, V.D. Satheesan na den Lok Sabha election nung party candidate ana, Shashi Tharoor aser Adoor Prakash nung sentong ka nung tangokba noksa nung angur.

Linük nung caste census shingai menokdangtetsü: Rahul Gandhi

New Delhi, April 24 (Agencies): Ato kilonser, Narendra Modi aija Bodhbarnü Congress lenir, Rahul Gandhi-i, peisasa 'linük meimertem' ta ajartemi caste census 'X-ray' tsübur, saka caste census ji shingai menokdangtetsü, ta ashi.

New Delhi nung 'Samajik Nyay Sammelan' sentong nung jembidang Rahul Gandhi-i, pa taküm nung nukjidongji linük nung ochi temeden mangur nütsüng shilem 90 nem ochi temeden agütsütsü atema lir, ta metetdaksü.

"Onoki sorkar akümba sülen mezüngbubaji caste census agitsü," ta pai ashi.

Paisa, Congress manifesto nung 'X-ray' aser Ato kilonseri yanglutetba 'income inequality' indang shia lir, ta metetdaksü.

Modi-i business nisung kar nem sen 16 lakh crore lezmüksü, ajisüaka Congress-ibo senotsü teimbaka nütsüng shilem 90 nem agütsütsü atema sentong renemer, ta pai ashi.

"Deshbhakt (linük meimer) kari kechi aginer? Deshbhakt kati linük nung ochi temeden aginer. Deshbhakt kati India tejakleni odaktsüner aser tashi tulu aliba linük kümdaktsüner. Anungji tashi tulu aliba linük kümnüra aser China ajangtetnüra linük nung nütsüng shilem 90 indang tashiji amshitsüla. Pei sasa 'deshbhakt' ta ajartemi X-Ray (caste census) tsübur," ta Rahul-i ashi.

Ato kilonser maneni aija Rahul Gandhi-i, "Küm 10 tashi Modi-i pa OBC (Other Backward Classes) lir ta

jembigo saka ni caste census atema jembiba sülenbo pai 'castes mali' ta ashir. Castes melira kodaser na OBC?. Süra nai na caste mali ta jembitsüla. Iba sülen pai, caste ana- takar aser sensaker lir ta ashir. Süra nai yamaji shira ni nü dang sensakertem list renemang ta ashir; yamaji asünung nai Dalit, Adivasis aser backwards angutsü," ta ashi.

Paisa, linük nung nütsüng shilem 90 atema ochi temeden tenangzükbaji yimtenren tsütsülen nungi masü saka pa taküm nung mission ka lir, ta ashi.

Paisa, BJP-i Dalits, OBCs aser tribals sendoktsü atema Pakistan, China aser Bollywood dak sendakba onüktem nung ang rangloker, ta ashi.

Linük nung rara adokra PM khuret asütsü: Asaduddin Owaisi

New Delhi, April 24 (Agencies): Ato kilonser Narendra Modi-i Muslim nung anema tesempa mapatong ayonger, ta shia AIMIM tongti lenir Asaduddin Owaisi-i, asüng linük nung rara adokra ibaji Ato kilonser khuret asütsü, ta ashi.

Ato kilonser tenangzükbaba "Modi ki guarantee" aija Owaisi-i, iba ya danga kecha masü saka Muslim nung sempapa guarantee lir, ta ashi.

"Modi indang guarantee ka dang lir aser iba guarantee ji Muslim nung sempapa. 2002 küm nungi tenzüka pai ibaji

inyaker," ta Owaisi-i ashi. Paisa, linük nung Muslim nung crore 17 lir, aser India nung minorities rongnungbo nütsüng teimtibaji Muslim lir, ta ashi.

"Pa ya linük nung nütsüng crore 140 atema Ato kilonser lir. Parnok (Muslim) yamai yirutsür, parnok yamai sempar! Asüng linük nung rara ka adokra ibaji Narendra Modi kija khuret asütsü," ta Asaduddin Owaisi-i ashi.

Ato kilonser Modi-i, election nung Congress-i takok ngua sorkar kümra parnoki linük rongsenji tanur teimba alirtem

nem agütsütsü, ta jembiba sülen Owaisi-i iba dak sendakba olen nung ajemdaker Modi aitsür.

Amongnü Banswara nung election sentong ka nung jembidang Modi-i, "Congress manifesto ajanga parnoki tetsütem aser tetsürtem den hon ongko inyaktsü, item osang jangjatsü aser rongsenji lemtsütsü ta ashir. Parnoki shirnok nem lemtsütsü-Manmohan Singh sorkari, linük rongsen temedenji mezüngbuba Muslim nung lir ta jembia liasü," ta metetdaksü.

(Maneni tapak 8 nung...)



April 24, 2024 nü Surguja district nung Lok Sabha election sentong ka nung Ato kilonser, Narendra Modi adenba noksa nung angur. Kasa noksa nung Chhattisgarh Chief Minister Vishnu Deo Sai-a angur.

People's College, Mokokchung

Kumlong Ward, Mokokchung Pin - 798601

JOB VACANCY

Interested candidates may send their Curriculum vitae / Resumeat pcolbog1@gmail.com latest by 1st of May 2024 for the following teaching positions :

- 1. Assistant Professor in Geography
- 2. Assistant Professor in Ao

SALARY : Rs. 25,000/- PM (inclusive of NET Cleared incentives)

**Sd/-
Chairman
Board of Governors**

Hathras nungi BJP MP, Rajveer Diler temelungjang tashidak agi asü

Lucknow, April 24 (Agencies): Uttar Pradesh kübok Hathras nungi BJP MP, Rajveer Diler Bodhbarnü temelungjang tashidak agi süogo.

Tan Lok Sabha election nungbo BJP-i pa nem party ticket magütsü saka party-i Hathras Lok Sabha menden nungi tokteptsü atema Anup Pradhan dang shim.

Osang angazükba agi, Bodhbarnü Aligarh nung Rajveer par kidang lia ajungbena süchia oadokba sülen kinüngertemi pa ilonga hospital-i anir ao saka doctor temi pa süogo, ta ashi.

2019 küm Lok Sabha Elections nung Rajveer Singh Diler-i vote tali 260,208 agi takok ngua liasü. Rajveer Diler-i vote 684,299 angu aser

Samajwadi Party nungi Ramji Lal Suman-i vote 424,091 ngua liasü.

Pa asüba osang angashia Uttar Pradesh Chief Minister, Yogi Adityanath-i, "Hathras Lok Sabha constituency nungi MP, Rajveer Singh Diler anojungi asüba osang angashia jashir. Iba ya BJP kibong atema takoksa tulu. Ni mangyimer kibong den mangyim jashi lemsateper. Ram tsüngremi asür nem tetemjen tesem ka agüjang aser mangyimer kibong züngsemtem nem tashi agüjang ta sarasademtsür," ta lemsatep.

Hathras Lok Sabha menden atema May 7 nü election agitsü. Iba menden atema Samajwadi Party nungi Jasvir Valmiki-i BSP candidate Hembabu Dhangar aser BJP candidate Anup Pradhan na den tokteptsü.



April 24, 2024 nü Mathura nung actress aser BJP candidate, Hema Malini-i Lok Sabha election atema nüboyimdang tangokba noksa nung angur.

EVM Microcontroller programme melenshitsu makok: EC

New Delhi, Rongchii/April 24 (Agencies): Bodhbarnü Election Commission of India (ECI)-i Supreme Court dang, EVM nung unit asemprong-Ballot Unit, Control Unit aser VVPAT shia peipei microcontroller lir, aser kodang data inokdir ibaji melenshitsu makok, ta metetdaksü.

ECI-i Justice Sanjiv Khanna-i aniba bench dang, shinga nema mekongshidaktsütsü atema item microcontrollers ji secure unauthorised access module nung ayur, ta ashi.

EC-i, EVMs nung amshiba microcontrollers ji 'khen atema amshiba program' lir aser kodang data inokdir joko melenshitsu makok, ta metetdaksü.

Parnokisa Supreme Court bench dang, PSU ana - Electronics Corporation of India Limited aser Bharat Electronics Limited nati symbol loading units (SLUs) renemer, ta metetdaksü.

Election ketdangsertemisa bench dang, election dak sendakba anema temepishiba ken o agütsür asü magütsüar metetsü atema Chief Electoral Officer-i High Courts nung Registrar General dangi shidi zülur, aser tashishiba mali ta telangzüba agütsüra EVMs rizünga ayuba strong rooms lapoktsü atema district officers dang tuyur, ta metetdaksü.

"Election dak sendakba temepishiba ken o agüja lira 'strong rooms' ji shibanga dang ayur aser shingai mekongshir," ta ECI-i metetdaksü.

2019 küm April ita nung Supreme Court-i ECI dang assembly constituency shia nung Electronic Voting Machine (EVM) shia VVPATs slips ka aliba nungi pongungu kümjang ta tuyua liasü.

SC-isa polling tembangba sülen polling station mashie pongu shimteta EVMs aser VVPAT slips na medemdangtsü tuyua liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, APRIL (RONGCHII) 25, 2024

Nüchiso bushirtem tia

Naga nung rongnung kar tular aser kar takar kümer anisüngzüka aliba agi nüchiso ngur ama bilema alitsüa akok saka tang tashi Naga nungertem rongnung tular tema tular yari aser takartema takar yari shisabulu lir aser libaliru nunga nüchipurbo memesük pei kisung ajungtsü bilema alir. Kasaji sensakertema sensaker yari aser tilar tema tilar yari timtem nung lir aser tebok dang süngra ojang ta asüba nung mashi ayoker aser mashi-mashi litepba purtem jenti kümogo. Iba kasa tia nung Naga nung nuchiso bushirtema pei pei yari shisabolu aser timtem nung lir. Aji oda, nüchiso atema külemi longjemer nokdaksü tentetba Naga National Council nungi tenzüka NNC-sa NNC aser NSCN-sa NSCN telok balala razüka oa kümtepba agi koba telokiang Naga nung asoshi yimten nüchiso bushi-ar mejangjai ka kümogo. Alemlibo Naga yimten nüchi indang jembiba manen aser nübortemi agütsüba saru agi linük mapa inyak. Ajisüaka, tanübo Naga yimten nüchiso bushirtemi timtem agütsüba indangang nübortemi jembir. Aji oda, Naga yimten nüchiso asoshi taküm ajak bendanga agüja rarar taküm aser tanelatem to amajok akümtsüsa tanübo Naga yimten nüchiso bushirtem agi rakzükratemer küma aoba alimai meteta asenoki jembir. Ibaji asenok ajak asoshi tenüngmenük ulura aser alima tsüngdang tejaka kodaka-ang mesayu taaktsüka lir. Aji oda, Assam Rifles aser Nagaland police-temi Naga yimten nüchiso bushir telok A telok, B telok aser Z telok nungi dena shishilembartem dang nungi tashiyim amshia saru meshiba aser rakzükratemba agi apuba angudang, nüchiso bushirtem tamachi akümba tia ka angur. Akhidangbo Naga yimten nüchiso bushirtem India nung sepai aser police-temi apurtemji rakzükratemba agi masü saka linük tenzüka mapa nung tsükchir anema raraba agi apubatem liasü. Ajisüaka, tanübo tangari mapuyonga pei teloki lenir dak temulung malemba agi menden nungi agientsüsa akümba tensa tia yagi asen lima yimten nüchiso bushir lenirtem libaliro tia indang sayur. Akhidangbo, linük tenzüka mapa nung inyakertem atema kilem anüng aser jara süngdonglidong ser mejang. Parnok chiyongtsüji arem nung parnoksasa meyiba süngoliotem liasü. Parnok rongnung karbo ali mejaka peisasa pei taküm kümzüka purtema lir. Ajisüaka, tanübo nüchiso bushirtema tesem tajung ka mesemteta 'designated camp' kümer yangji alir. Ibaji asenok asoshibo tepuokdak ki-ang mesük. Ano, yimten nüchiso atema raraba tongpang nung menokdakertema nüchi amato saka nüchi shisatsü maden Delhi nungi yokba relief jang sorur RD nungi yokba senotsü mechimenu agi aon alia chiyonga küm nungi küm süidaksür. Item jagi küm pungo nung khen yimten nung pei temeten indang jembitsü, ajia jembia jembia tesüsabo senyong aser mapayong ayoktsü. Item ama asenok aliba tia indang ya kodang bilemdangdir, yimten yimsüsüri anir asenok ajak ya nüchi akümtsü merangertem masü saka yiar aser sowar akümtsü merangertem amai dang angatettsü. Nüchi asünungbo shiba pei nübortem asoshi yimten nüchiso bushia-bushia pei asoshi rongsen bendentsüang bilemtettsü? Aji oda, nüchi asünungbo shibaibo pei akaba kiojen, kimunglumong ajak yoktema yoker sentem tulu nung sen apua MLA akümtsü merangtsü? Kasaji, nüchi asünungbo shibaibo pei vote yoka kibong mesütsü bilemtsü? Itemji mesüka, nüchi asünungbo, shibaibo tangar meyong vote proxy enoktsütsü maaktsü? Asenok nüchi masüba agi tangari sowar amai mesüshir. Shibaibo tajemrep tia nung alir atema yokba Relief jang chiyonga kecha meinyak taküm alir kin akhümtsübuttsü? Shibaibo Designated Camps nung lia rongsen bushir ken o nanga agitsü? Asenok ya tamachi saka nüchi ama bilemertem lir. Nüchi purtemi dang nüchiso bushir aser ajangzükteter, anungji nüchiso atema asenok tama ano khen nüchi akümtsüla.

OLEMSABANG

Yimsüsür-i ken o kanga kümdanga jembitsüla

~ L. Kika Pongener.

Tanü asen Naga lima nung yimsüsür aikati kanga junga meshisadangi, yimjak nung ken o jembiba angudang kanga-sa süngmanger...!!! Aser-bo nubur dang ni aibelena jembigo kü dang tai tokang ta tatok nangzüker...Yimsüsür-i iba amai jembiba angudang kanga-sa temenunutsüka bilemer. Yimsüsür ka yimjak nung nubur dang tatok nangzükbaji konangnungsang ka masü, saka maaksu tulu ta metettsüla. Iba amala yimsüsür kaji nuburi aküm-metsübur aser nubur madak lennitsü tetemsu masü ta nuburtem-ibo agir. Lok Sabha Election atema nubuyimba lokti-senden nung, Deputy Chief Minister aser BJP lennir Y. Patton-i nubur mashileni anitsüsa ken o jembiba, Social media nung ngur nubur aika kanga aoksaogo...!!! Deputy Chief Minister aser BJP lennir-i Nagamese oshi agi...Village Council Chairman, Gaon Bura, Polling Agents nem dang Vote enokdakjang...Yimdaklir nem timtem tagütsü...Parnok mapai yokang...Yimtsüng lennirtemi dang yimer Vote ajak enokdakjang...ta jembiba, Social Media nung jangja-jangja-a nguogo. Aji oda, yimsüsür tazüngbur kati iba ama temzüng-ozüngi memelaba o jembiba jagi, alima matsüngdang pa jenjang aser sorkar noksa sayuogo. Yimsüsür shiba sudir suang, paji sorkar nung tongti mapa (Post) ammer ketdangser ka asünung, pa koba lokti nung nokdaka ken o jembidir, pa nija (Individual capacity) nung jembir masü, saka sorkar sentsü (Colour) bener aser sorkar tashi (Power) ammer jembir. Aji oda, yimsüsür-i ken o aibelena jembira, pa nija (Individual) dang masü, saka sorkar-a dena tenung menuktsür. Anungji yimsüsür ajaki yimjak nung ken o kanga junga shisadanger dang, kanga dang kümdanga jembitsüla.

Aji oda, tang Lok Sabha Election nubuyimba lokti-senden nung Shri. Y. Patton, Deputy Chief Minister-i kechi o jembir, iba o-ji sorkar o aser Bharatiya Janata Party (BJP) Party o-a ta nubur ajaki agiogo. Taoba mapang ka nunga Shri. C. L. John, Minister of Environment, Forest & Climate Change-i Shidi (Elephant)-i nisung tepsetba aser Shidi kahsetba indang Assembly nung jembidang, kanga junga meshisadangi jembiba agi kin kar temulong yirudaksüogo. Ano tesuiba mapang ka nung, Dr. K. Yhome Advisor, School Education & SCERT-i Primary School Teacher appointment dak sendakba ken o nung meshisadangi jembiba agi kin kar temulong yirudaksüogo. Ano tawa Election nubuyimba lokti-senden ka nungsa, Shri. Chingwang Konyak, NDA & NDPP Chairman-i ENPO-i Election nung shilem magitsü lemtetba dak sendakba ken o nung mekümdangi jembiba agi ENPO aser Konyak Civil Society telok temulong yirudaksüogo. Aji oda, sorkar nung yimsüsür tazüngpur mapa benloksübaji mashi nisung ka nem mebendaksür. Ajisuaka, iba ama akümket lennir-i tebilemdang meli-i, ken o jembizüka yokli...Ni aibelena jembigo tai tokang...ta nubur matsüngdang tatok nangzükli...ta asüba kanga temenunutsüka lir. Aji oda, yimsüsürtemi yimjak nung tapi-tapi agi ken o jembizüka yokli aser nubur dang tatok nangzükli ta asüba...Konangnungsang ka masü, saka maaksu tulu ta metettsüla, aser pa kija maaksu masü, saka pa tenzüka sorkar aser pa adenba Party-jia dena maaksudaksür aser tenung menuktsür.

Aji oda, yimsüsür tazüngburi yimjak nung, temzüng-ozüng agi melaba ken o, aser shitakba teinyaktsü mapatong indang, nuburtem nem ret-reta angatetdaksütsü melena, nubur mangmangdaksütsüsa, temzüng-ozüngi memelaba ken o jembibaji kanga-sa mashi-malo asütsü. Ajiser, iba o-ji asaya-menua jembiba danga ta salep-saribaji kanga-sa temenunutsüka lir. Yimsüsür ka nuburi akümtsübuttsüsa alitsüba ashi...Nubur menudong ka asütsüsa malitsüla. Iba ama yimsüsür kaji nubur madak yimsüsür asütsü medemsu ta nuburtem-ibo bilemer. Anungji pei sasa angateter pei amenba menden toktsütsüla-a ta nuburtem-ibo bilemer. Kechiyong pai nutsüng-nubur noklang aika adenshia aliba lokti-senden ka nung, nutsüng-nubur hau ta züngshia mali temzüng-ozüngi memelaba ken o jembiba jagi, pai nuburtem mezüngmeshiogo, aser pei sasa paji nubur madak lennir asütsü medemsua ta küli sayuogo. Anungji sorkar-i aji odang toktsütsü asü...??? Mesura tapet temerenshi agütsütsü...??? Aji oda, iba ama yimjak nung nubur matsüngdang pa tenzüka sorkar maaksudakja aser tenung menukja, temzüng-ozüng agi memelaba ken o jembibaji odangpo metoktsütsüla-a ta nuburtem-ibo angateter. Kechiyong pai kanga junga meshisadangi ken o jembiba jagi pa amenba menden (Post) pai pei sasa sensa-masa-a mezüngmeshiogo.

Tanü ama tashitemetet aser tejakleni aoba putu ka nung, iba amala yimsüsürtemi linuk aser nubur tejakleni anir mootettsü ta nuburtem-ibo bilemer. Anungji iba ama yimsüsür jagi, pei sasa angateter pei amenba mendenji azüngteta toktsütsüla-a ta nuburtem-ibo bilemer. Aji oda, aibelener yimsüsür kati nutsüng-nubur dang aibelen mesui shitak inyakang ta koda shitettsü...??? Ni ama nenokia aibelen-ang ta ashitsü asü...??? Tanü asen lima majungba ya, iba ama aibelener yimsüsür-i yimsu asüba agi majunger. Election timi agitsü atema Election Commission Model Code of Conduct lateta lir. Ajisuaka, yimsüsür tazüngbur kati Election Commission temzüng-ozüng agi memelaba o jembibaji...Election Commission-ia kechi ashir...???...ta nuburtemi tenuk yoka reprangdagi. Anungji temzüng nung aliba ama aibelener dangbo aibelenogo ta indang-indanga shitettsüla aser tapet temerenshi agütsütsüla. Ajioda, temzüng-ozüng shidak meinyaktetba sorkar-ji alima nüburi aküm-metsübur aser meraketa merepranger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tensa mejungaka Khristantemi Israel-i oa temeshi tesemtem semdang



Temeshi aini aoer Khristantemi Yirusalem nung Church of Holy Sepulchre semdangba mapang tangokba noksa nung angur. Iba tesem ya Yisu leper alidak liasü ta amanger.

April 24, 2024: Tawa Iran-i Israel amakba sülen tensa mejungi liaka alima tesem balala nungi Khristantemi Israel-i oa temeshi tesemtem semdang.

Tawa Iran-i ballistic missiles aser drones 300 shi amshia Israel amak saka Israel den Jordan, United Kingdom aser US sepaitemi item missiles aser drones shilem 99 bo nokdangteta liasü.

Tan ita tetenzüklen Israel-i Syria nung Iran Consulate amakba atema mangyanga Iran-i Israel amak, ta Iranian Revolutionary Guards-i metetdaksüogo.

Osangbener kati, taoba hopta tatembanglena alima tesem balala nungi Khristantem aikati Yirusalem nung Church of the Holy Sepulchre

semdangogo, ta metetdaksü.

Temeshi aini aoer Khristantemisa Palestine kübok aliba Bethlehem nung Church of the Nativity semdang.

"Bethlehem nung Khristantem ya minority kümogo, ibayongji loktiliba aser yimtenren tsütsü Khristantemi timtem ajangshir aser Palestine ketdangsertem mapatong balala ajanga Khristantem kanga timtemer. Ajisiüaka raliwalirtem aser temeshi ainlen jajartem aikati taoba hopta nunga temeshi tesemtem semdangogo," ta kasa osang ajanga metetdaksü.

Turkey mesüra Palestinian areas nungi Muslim nungertemia Bethlehem nung temeshi tesemtem semdangogo.

Muslim nungertemia Yisu tetsü Mari ya kanga keta asener, kechiyong parnok indang temeshi kaket Quran nunga la kanga asüngteta aliba taküm ka aser Tsüngremi tetsür ajak rongnungi la shimtetba indang shia lir.

Jewish Virtual Library ajanga-a Bethlehem ya Abrahamic yimsü ajak (Khristan, Muslim, Yihuda) atema tongtibang ta züngshiba sayur.

Amongnü Iran armed forces chief of staff, Major Gen. Mohammad Bagheri-i, Israel-i mangyangra Iran-i ano tesashiba amaksü aser US-i Israel pusemra Iran-i US sepaitem amenoka aliba tesemtem amaksü, ta amokmerenogo.

NCDC-i Kerala nung UDF aser opposition INDIA teloktep pusemer

April 24, 2024: Dalit nung Khristan organization aika densema aliba National Council of Dalit Christians (NCDC)-i Kerala nung UDF aser INDIA teloktep pusemer aser constituency 16 nung UDF candidate tem atema nüboyimtsüba nung shilem agir.

NCDC-i BJP-i aniba National Democratic Alliance teloktep anema nokdaker, kechiyong NCDC-i Supreme Court nung Dalit nung Khristantem atema Scheduled Caste jenjang akhangba nung NDA-i meyari, iba dak alia BJP yimsüsüba kübok minorities anema inyakba kanga bulua akümba agi NCDC-i sorkar anemer, ta NCDC Tir V J George-i metetdaksü.

NCDC-i LDF danga mepelaba metetdakja George-i, "2016 küm LDF-i manifesto nung Dalit nung Khristantem dang nangzükba onük pongu parnoki mataloktsü," ta ashi.

Dalit nung Khristantem dang onük pongu nangzükba agi 2016 küm election nung NCDC-i LDF yaria liasü, saka tan election nungbo parnoki UDF aser opposition INDIA yarir.

George-isa, "Kerala nung Pinarayi Vijayan-i aniba sorkari shisaliok rejutem nung Dalit Khristan kaketshirtem nembo stipend aser lumpsum grant schemes magütsü. Onoki district balala nung longkak anaben ait aser temepishiba aiben agütsü saka sorkari tekong meranger," ta ashi.

Kerala nung Dalit Khristan nütsüing 159,000 lir ta osang ka metetdaksüba sülen George-i, iba osangji shidak masü, kechiyong CSI Madhya Kerala Diocese kija nunga Dalit Khristan nütsüing 100,000 dak tema lir, ta metetdaksü.

Osangbener den jembidang George-i, "Kerala nung Dalit nung Khristan lakh 30 dak tema lir. ibayongji onoki sorkar dang Dalit Khristantem nem sorkar mapa shilem 1 lemzükja aliba nungi shilem 4 kümjang ta takhangba agüja liasü. Onokisa shisaliok rejutem nunga menden shilem 10 lemzükjang ta takhangba agüja liasü, ajisiüaka sorkari magizük," ta metetdaksü.

Ano külen Kerala nung Syro-Malabar Church-ibo BJP pusemer ama repringteter.

Tawa putir Xavier Kudiasseril-i ocer ka nung Modi-i linük nung terenlok mapa junga inyakba atema tenüngsang agüja liasü.

Ajisiüaka Verapoly Archdiocese-ibo putiri jembiba oji pa nija tebilemba lir, ta metetdaksü.

India nung küm shia Dalit Khristantemi August 10 anogo nung "Black Day" amonger aser Dalit nung Khristantem aser Muslim nungertem nem reservation agüjang, ta takhangba agütsür.

Iba anogomong nung linük tesem balala nung Khristantemi longkak aita jajar, lokti senden ayongzükba agir aser o entepba sentong balala ayongzükba amonger.

Khristian denominations balalaisa sorkar dang Dalit nung Khristantem nem sorkar mapa aser shisaliok rejutem nung menden shiteta yutsütsü (reservations) atema scheduled caste (ST) jenjang agüjang, ta takhangba agütsür.

Tang India linük nung Khristan nütsüing million 25 shi lir aser iba nungjagi shilem 75 bo Dalit nung Khristantem lir.

ANO GO ABEN TSÜNGREM DEN

Pa mapa züngdangang

"Aser tangari tasü shia aruba tajungba ngutettsü asoshi pai tekümzük magizüki timtemdaksü" (Ibri 11:35).

Thomas Brook-i yamai zülu : "Tsüngremi arogo sarasadem langzúa Peter tepuokdak nungi anitettsü asoshi kotak tenyar yok. Rishikangshi mapang aser timtem mapang nung sarasademi kechi inyaker asenoki mezüngdangi malitsüla." Kodang tetepseteri asüngdang, Bishop Polycarp-i langzü: "küm tir trok ni Khrista tenzük aser pai ni kodanga kecha nunga meyrutsü mesura mashioktsu." Süra kechiba ni kü chuba aser kümtetdakba atalatsü?" Henry Vosi iba o jagi pa merenshia reshikangshirtem mak südaktsü, "Ni tekolak ana aden asübo ajakji Khrista asoshi südaktsüla." Tahir Iqbal Muslim nungertem temulung meyiper kati tepuokdak 1993 nung yamai sangoktsü: "Ni lisü nungji meseptsü, saka ni kodanga kü tamang magizüki malitsü." Reshikangshirtemi asen sarasadem koda nungdaker.

Stefen sarasademi Saul dak kongshi. Kodang Saul Khristan aküm aser osangtajung sayutsüngir ka aküm, nuburtemi asüngdanga ashi: "Iba tenüng nung ajar reshikangshir nisung to ibai masü no." (T. Mapa 9:21; 22:19, 20). William Tyndale, Lai meyiper aser teyanglushir, pai mi nung merongset tsüngda tatembang sarasadem, "Kibuba, England chuba tenük lapokjang." Tsüngremi pa sarasadem langzü, aser chubai Laishiba meyiptsü mela. Shibai king James version mangashi ali.

Uttar Pradesh nung Allahabad High Court-i Khristantem temepishiba agizük

April 24, 2024: Uttar mesüra tekülem sentong Pradesh kübok Azamgarh agibaji ozüing alema inyakba nung District Magistrate-i masü, ta shia court-i Khristantem sarasadem temepishiba agütsür sentong aser Tenla kidang Khristantem dang nenoki tekülem sentong agidang maneni District Magistrate of timtem tagütsü, ta Azamgarh ajurua tebilemstü metetdaksüogo.

Allahabad High Court tetuyuba nung ajemdaker Allahabad High Court-isa Azamgarh district magistrate- District Magistrate dang, i ketdangsertem nem iba item ama temepishiba ken tetuyuba agütsü.

Yaküm December ita nung Khristan organization balala nungi Nirmala Sukh, Shyamanand aser Sanjay Kumar nungeri Allahabad High Court dang Khristantem tekülem sentong tesünap nung agütsü atema tekümzükba agütsüdaktsüner, ta mepishia liasü.

Parnokisa court dang, telok kari onok sarasadem sentong agütsür, aser item sentongji tangartem Khristan yimsü dangi meydaktsütsü atema ayongzükba agir, ta onok nem tai tongloksür, ta metetdakja liasü.

December 8, 2023 nü Allahabad High Court-i, sarasadem sentong agiba tesüsa April 10, 2024 nü District Magistrate-i Honibar anogotem, Amongnü anogotem, Khristmas, Good Friday aser Easter ama anogotem nung Khristantem tekülem sentong agidang shingai timtem magütsütsüla, ta tetuyuba agütsü.

AO OSHI ANGAZÜKDAK:

TANÜ ANGAZÜKTSÜBA OJANG



Süngjanglijang

(n) süngdong nung atangba tejang tulu tila ajak (all kinds of fruit)

* Süngjanglijang tangzükba mapang yipru aitba ya majung.

Süngjem

(v) ajemajema aküm (calm)

* Yipru aitba sülen alima süngjema aküm.

OLONG PAITEP # 6767

	1		2			3		4		5
6								7		
					8		9			
			10							
11										
				12						
13	14		15							16
17										18

TIPIEN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _ _ _ _
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. _ _ _ hi
- 16. Akümüli nungi pilar

OLONG PAITEP # 6766 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Alima nung tetsür kou talangtibaji awabaji Slovakia tsür Aliia Nasyrova lir. La tar ya 5 feet 4 inches (165 cm) lir aser la kou ya la tar dang nungi 3 feet (about 92 cm) agi talangtiba lir. Guinness World Record ajanga Aliia Nasyrova nem "longest hair on a living person (female)" tenüing jaloktsüogo.

NIA nem Kangpokpi bomb pokdaksüba bushisüngdang südakjang: COCOMI

Imphal, April 24, 2024 (Agencies): Manipur nung Meitei nung telok Coordinating Committee on Manipur Integrity (COCOMI)-i tawa state nung tensa mejungi akümba atema tebilemetsü abenba metetdaksüogo.

Manipur kübok Kangpokpi district nung Bodbarne apu ka nung bomb pokdaksüba bushisüngdangtsü atema COCOMI-i takhangba agütsü.

Manipur sorkari Kangpokpi apu nung bomb apokba ya National Investigation Agency (NIA) nem bushisüngdang südakjang ta takhangba agütsü.

NIA-i bushisüngdang asüba ajanga Manipur nung nisung million 3.5 nem temeten agütsü ta COCOMI-isa ashi.

Kuki telungpurtem ta temulung melemer kari

improvised explosive device (IED) ka pokdaksüdag culvert bridge ka raksa.

Iba ajanga Imphal aser Dimapur, Nagaland sendaktepba national highway 102 nung garitem mesenzüteter.

Manipur nung Lok Sabha election tanabuba shilem agütsü mapang ka nung telungpurtemi iba mapa inyakogo. April 26 nü scheduled tribes atema lemzüksüba Outer Manipur Parliamentary menden atema polling asütsü.

Bodbarne Supermeina aser (Koubru) Laikha tsünga apu nung IED ka pokdakja liasü. Iba ajanga Imphal-i khu bener aoba gari 300 shi Manipur-Nagaland arrtsülen anendena lir.

Sorkar ketdangsürtemi Kuki telungpurtem dak tai tongloksür saka tang tashi nung telok

kechaia tenüing agiba osang memetdaksü lir.

Kuki nung kaketshir telok katia iba tatalokba aitsüogo aser kin hohotemi emergency meeting ka ayonga amen.

Kangpokpi District Magistrate/DC-ia Sapermeina aser Koubru Laikha tsünga apu nung gari tulutem mesenzüttsü tetuyuba agütsüogo.

Senzüsenbongertem kümzüka ayutsü atema iba tetuyuba agütsür ta pai ashi aser Superintendent of Police, Kangpokpi dang Sapermeina nungi Koubru Laikha tashi traffic ketdangsütsü tetuyuba agütsüogo.

National Highways and Infrastructure Development Corporation Limited (NHIDCL)-ia iba tesemi telok ka yoka mapa inyaksü teimla lir.

Assam 'dry period' alitsü

Guwahati, April 24, 2024 (Agencies): Assam nung Lok Sabha elections tanabuba shilem agütsü mapang tonga arudang state election commission (SEC)-i 'dry days' osang metetdaksüogo.

April 24 nungi April 26 tashi ghonda 48 atema dry day alitsü ta parnoki ashi.

Assam nung elections agütsü aliba Lok Sabha constituencies nung 'dry days' alitsü ta state election commission (SEC)-i metetdaksüogo.

Iba tetezü Darrang-Udalguri, Diphu, Karimganj, Silchar aser Nagaon Lok Sabha constituency tem nung yi mayoktsü. April 24 nikongdang 5:00 ako nungi April 26 nü polling metembang tashi 'dry days' alitsü.

Office of the CHAKPA SENSO MUNG DANG

P.O. Chuchuyimlang, B.P.O Chakpa Village, Mokochung, Nagaland

TETUSHI AGÜTSÜR

Chakpa Senso Mungdang ajanga Mr. Besoaluchu Chang aser Mrs. Sometnaro na jabaso, **Mr. Chubalemba B. Chang**, shibai AIR 915 UPSC-CSE 2023 exam nung takok ngutetogo, pa dang pelaba den tetushi tulu agütsür. Ibai sensosanger ajak asoshi konang aser takok korang ta züngshir aser ne takok tepela den sensosanger ajaki pelasemer. Tanü nai iba takok ngutetba ya nukjidong tejangja yur meranga shisaluyimba süngjang lir ta kuli agütsür aser sensosanger shisaluyimertem asoshi tangazüksü aser temulungdangtsü tamendakdak jenjang lir.



Ne tenzüka wadang nung Tsüngremer temoatsü aser takok adentsü tamang tulu ayur.

Sd/- Longrikumsang President (CSM)

Sd/- Tiatemsu Gen. Secy. (CSM)

DIMAPUR MISSION HR. SEC. SCHOOL

Churches Colony, Khermahal, Dimapur, Nagaland
e-mail: dmhssdim@gmail.com

ADMISSION OPEN 2024

Admission Forms and Prospectus for Class 11 (Arts) both Boys & Girls available at the school office. (8:30 am -2 pm)

Special Features:

- ❖ Well experienced and dedicated teacher.
- ❖ Special Remedial classes.
- ❖ Co-curricular Activities
- ❖ Focus on Academic Excellence and Personality Development
- ❖ School Bus.
- ❖ 24x7 Power supply.

ADMISSION WILL BE GIVEN ON FIRST COME FIRST SERVE BASIS.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

NO.HED/HOST/1/2016

Dated: Kohima, the 24th April 2024

NOTIFICATION ON NEW HOSTEL REGISTRATION FOR POST MATRIC STUDENTS

It is hereby informed to all those seeking for New Hostel registrations under the Directorate of Higher Education that the Directorate (Scholarship Section) shall issue forms for New Hostel Registration with effect from 1st to 31st May 2024 and the last date for submission of the forms will be 7th June 2024. Therefore, any individual who wishes to run a hostel for Post Matric Students may come and collect the forms within the stipulated time.

The registered hostels that are due for renewal are also directed to renew on or before 7th June 2024, failing which the hostel shall be considered null & void.

It is also to be reminded and cautioned that the Department issues this Hostel Eligibility Certificate only to facilitate hostel forms for Post Matric Students residing in the Hostels under the provision of Scholarship guidelines. Hence, any misuse of Hostel Certificate shall be liable to his/her own risk.

**Director
Higher Education
Nagaland:Kohima.**

US-i Pakistan nem tekümdangtsü metetdaksü

Washington, Rongchii/April 24 (Agencies): Iran Tir Ebrahim Raisi-i Pakistan semdangba mapang security aser rongsenketzung nung tenangzüktepba yangluba sülen, US-i Islamabad dang parnok nema tenokdangba agütsütsü ana nung aliba tekümdangtsü metetdaksüo.

"Iran den shishilembaba tsütsü tesendaktep yanglutsü alirtem dang parnok nema tenokdangba agütsütsü ana nung aliba meteta alitsü ajungshir," ta US State Department otongdar Vedant Patel-i Mongolbarnü Washington nung osangbenertem dang ashi.

Washington-i taoba hopta Pakistan ballistic missile program atema supplier tem nem tenokdangba agütsüba sülen tang iba tekümdangtsü metetdaksüo. Supplier tem rongnung China aser Belarus nung amendaker aliba base pezü densema lir.

Iran nungi gas pipeline ka bener arutsü atema project ka asüngsashitsü atema Pakistan-i meranga arudar, koba US-i tenokdangba agütsütsü tsübuba ajanga küm aika inyaksangshi mesüi aruogo. Pakistan-Iran pipeline indang asüngdangba mapang Assistant Secretary of State Donald Lu-i congressional hearing ka nung Biden administration-i Iran dak sendakba nung tenokdangba agütsür aliba ajak benoktsü, ta langzü.

Pipeline dak sendakba nung t e n o k d a n g b a magütsükdaktsütsü atema mepeshitsü Pakistan sentong lir. Raisi-i Pakistan toktsür aoba sülen Bodhbarnü sangdong ka ajanga, linük anapronglai gas pipeline project densema energy dak sendakba nung sendaktepa inyaksü koda tongtibang iba indang mulungtepogo, ta ashi.

"US-i Pakistan aser Iran na tesendaktep yanglushiba maginütsü," ta University of

Karachi nung professor Shaista Tabassum-i ashi.

Pakistan Ato Kilonser aser Raisi na matsüngda Islambad nung tenangzükteba ti yangluogo, kong special economic zone ka amenoktsüba densema lir, ta Associated Press of Pakistan-i metetdaksü.

January ita kiralongrartem dak rangloker linük ana missile khatepba sülen tang tesendaktep yanglushitsü merangba mapang ka lir.

Raisi-i Hombarnü osangbenertem den sensaksemba mapang, taruba küm asem pezü tsüngda Pakistan aser Iran na shishilembaba USD billion 10 agi ajungkettsüla, ta ashi.

Iba hopta Iran aser Pakistan nati linük anaprongla nung kiralongrartem inyaksangshiba nokdangtsü mulungtepogo, ta Pakistan Interior Ministry-i ashi. Küm ti tsüngda Iran tirtem rongnungi Pakistan mezüngbuba semdangbaji Raisi alitsü.

Russia deputy defence minister Ivanov-i sübokrem agiba aitsü

Moscow, Rongchii/April 24 (Agencies): Russia deputy defence minister sübokrem agiba atema aitsüo aser pa Moscow nung okadak kati sota yua lir.

Timur Ivanov, shibai iba taitsüba magizük, pa ya sübokrem aika agiba atema aitsüo.

Arishi küm 47 tain Ivanov ya 2016 küm defence ministry nung aniok aser pai Russia indang military infrastructure project tem achayanga liasü.

Activists temi Russia nung ochi mashi inyakyim balala aliba indang aiben ashishia aruogo.

Ajisüaka 2022 küm Russia-i

Ukraine amak tenzüka sülen temaba jenjang nung aliba ketdangsurtem anema jenjang agiba kangabo mataloki aruogo.

Ivanov ya Defence Minister Sergei Shoigu den kanga junga sendaktepa aliba nisung ka aser pa Shoigu den küm aika inyaka aruogo. Pa ya Shoigu-i mapang tatsüka governor mapa abenba mapang Moscow region indang deputy prime minister liasü.

Russia indang media kar nung Ivanov ya linük anema inyaksangshiba atema temulung melemi apu ta ashiba Kremlin-i aitsüo.

"Iba ken o dak sendakba

nung o aika adoker. Nenoki takok tashi official osang dak rangloksüla," ta otongdar Dmitry Peskov-i osangbenertem dang ashi.

Paisa, Ivanov sota mayu tsüngda Tir Vladimir Putin nem jelia osang agütsüo, ta metetdaksü.

2022 küm opposition lenir Alexei Navalny-i tentetba Anti-Corruption Foundation (ACF)-i, Russia-i atsünger aliba Ukraine nung litsü nung scheme balala benoka inyakba mapang ochi mashi inyakyim nung densemaba atema Ivanov aija liasü.

(Maneni tapak 8 nung...)

OFFICE OF THE LANGPANGKONG KAKETSHIR MUNGDAK
Langpangkong Students' Conference
H.Q. Chuchuyimlang - 798614, Dist. Mokokchung : Nagaland
Email : Langpangkongkaketshirmungdak@gmail.com

TENÜNGSANG AGÜTSÜR

Langpangkong Kaketshir Mungdak (LKM) Mendenti ajanga Langpangkong nung Sp.Chubalemba B Chang Wb.Besoaluchu Chang aser Wt.Sometnaro Chang-er jabaso Chakpa Yimdam nungi UPSC-CSE 2023, Rank 915 nung Langpangkong nung ajak numa atangtsüsa konang aser takok tulu angu nung pa nem tenüngsang agütsür aser Tsüngrem tenüng asanger.

Tsüngremi nü taküm aser wadang maneni moajangma ta LKM sarasadem.

Sd/- IMLINOK
President, LKM

Sd/- MEYITONGPANG
General Secretary, LKM



Office of the AO KAKETSHIR TELONGJEM, SHILLONG
H.Q. Shillong, Meghalaya
Email: aktsshillong18@gmail.com

METETDAKTSÜR

Ao Kaketshir Telongjem Shillong ajanga neburtem ajak dangi Salem abener.

Aor Kaketshirtem, Shillong nung arua zünger kar teyari nungdakra, Ao Kaketshir Telongjem Shillong Office ajanga yariteptsü mulunga lir. Anungji School aser College nung admission maparen mesüra tapet hostel/paying guest bushiteptsü atema teyari nungdakra, agüja aliba contact number nung tongtepreteptsü sangdonger.

Nokchira I. Jamir (AKTS Tir) : +91 8787535327
Odichung Jamir (AKTS Tatong Tir) : +91 6909874173
Arrkimong Jamir (AKTS Tongti Zülur) : +91 9863017578
Sentinaro N. Jamir (AKTS Repsem zülur) : +91 9863239046

Sd/- Nokchira I Jamir
President (AKTS), # 8787535327

TNAI NAGALAND BRANCH LOTTERY RESULTS
Draw held on 24/04/ 2024

1st Prize - Ticket Number 3367
2nd Prize - Ticket Number 0075
3rd Prize - Ticket Number 4108

Ticket Number of Consolation Prizes :
3934, 1928, 4059, 2299, 1673, 3627, 3676, 2961, 4249, 4514, 1423, 1554, 2058, 4457, 1428, 0714, 0289, 3525, 2936, 1833, 3428, 0957, 0573, 4215, 3421, 0511, 4036, 0185, 0711, 3344.

The winners must claim their prize within 15 days from the draw date
Torn/Mutilated Ticket will not be accepted
The decision of the planning Committee shall be final
Contact Number 8014537648 // 9378067082

CHUCHUYIMLANG

Moatsü 2024
Cum
Laying of Foundation Stone: 24
Yaküki HiEERA
Development Projects Pvt Ltd

Date : 2nd May 2024 ♦ Time : 10:00 AM ♦ Venue : Anü Mai Amphitheatre

Special Guest
Shri. Kekhrievor Kevichusa IPoS
Commissioner & Secretary
Department of Industries and Commerce
Kohima, Nagaland

Time - 10:00 AM
Laying of Foundation Stone : Yaküki HiEERA Development Projects Pvt Ltd by the Special Guest

Time - 10:15 AM

Compere : Miss Arenla Longkumer
Miss Akumsangla Jamir

Invocation : Mr. Luin, Associate Pastor

Welcome Address : Shri. Ao Sanen Pongen, Chairman
Chuchuyimlang Village Council

Moatsü Medley : Medemsanger
(I/c Chuchuyimlang Students' Union)

Cultural Extravaganza - I
a. Yangpi Cultural Troupe (Chang Tribe)
b. Meyi Moyu (I/c 7Buba Kosasanger
Sungpo Zünga, Chuchuyimlang)

Short Speech (5mins): Shri. P. Tokugha Achumi
Director, Industries and Commerce
Kohima, Nagaland

Cultural Extravaganza - II
a. Ukha Cultural Troupe (Konyak Tribe)
b. Aroju nung tenüng atemba
(I/c Aroju Club, Chuchuyimlang)

Short Speech (5mins): Shri. Arnab Chakraborty
Director, Empretec India Foundation

Speech from the Special Guest
Presentation : AZUTO KEN (I/c Shri. Yarentemjen GB & Shri. Marnokden GB)

Cultural Extravaganza - III
a. Unger Cultural Troupe (Ao Tribe)
b. Yaongyimchen Cultural Troupe
(Phom Tribe)

Benediction : Mrs Ayangla APCE
Chuchuyimlang Town

Evening Session
Moatsü Fest Open Concert
(In celebration of Yaküki HiEERA Development Projects Pvt Ltd)

- ❖ Sunep Lemtur, Main Artist
- ❖ Linüknao
- ❖ Nüngdemnungla
- ❖ Atsünglir Jamir
- ❖ Lima A Pongen
- ❖ Imlisen A Jamir
- ❖ Limatenzüik
- ❖ Akumyanger
- ❖ Winner (Online Ao Moatsü Folk Song Contest)



Senior Men's Inter-District One Day Tournament 2024 asaya osang

Dimapur, Rongchii/April 24 (TYO): Nagaland Cricket Association (NCA)-i ayongzüka tang asaya aliba Senior Men's Inter-District One Day Tournament 2024 nung Bodhbarnü Nagaland Cricket Stadium aser Sovima Cricket Ground nung team tem tsüngda kanga toktepa asayaogo.

Nagaland Cricket Stadium nung asayaba asaya nung Mon-i wicket 9 agi Zunheboto team kokogo. Mon nungi asayar Santosh Kumar-i out mesüi run 26 yangluba den run 7 agütsür wicket 3 agia kanga junga asayaba sülen pa nem Player of the Match naroküm agüja liasü.

Iba asaya nung Zunheboto team-i Mon team nungi bowler temi aonba ball junga masayatet

aser parnok i run 58 dang yanglua liasü.

Sovima Cricket Ground nung asaya Tseminyu-i run 71 agi Peren madak takok ngua liasü.

Asaya nung Nuntilo Magh-i ball kanga junga ona run 33 agütsür wicket 6 agiba atema pa nem Player of the Match award naroküm agütsü.

Mezüng batting aenba sülen Tseminyu team-i run 152 yanglu aser run arishiba mapang Peren team-i run 81 dang yangluteta liasü.

Match 3: Nagaland Cricket Stadium

Zunheboto: over 17 nung run 58/10 (Atoka H Sumi 27, Bekuto 06; Santosh Kumar 3/7, Mughavi Wotsa 3/8)

Mon: over 7.1 nung run 62/

1 (Santosh Kumar 26 not out, Renthungo Lotha 20 not out; Atoka H Sumi 1/19)

Result: Mon-i wicket 9 agi akok.

Player of the Match: Santosh Kumar (Mon), 26 runs not out, 3 wickets.

Match 4: Sovima Cricket Ground

Tseminyu: overs 29.5 nung run 152/10 (Nyuyhenlo Kemp 25, Shyerinlo 24; Zai Zai 3/20, Rokovoto 3/36)

Peren: overs 23 nung run 81/10 (Bamyibe Npanme 29, Parbez 16; Nuntilo Magh 6/33, Shyerinlo 2/24)

Result: Tseminyu-i run 71 agi akok.

Player of the Match: Nuntilo Magh (Tseminyu), 6/33.

South Asian Triathlon Championship nung India nunger 33-i shilem agitsü

Rongchii/April 24, 2024 (Agencies): Asayar tejen Adarsh Muralidharan Sinimol aser Pragnya Mohan nati anir taruba South Asian Triathlon Championship nung India nunger asayar 33-i shilem agitsü. Iba asayamung ya Asia Triathlon Cup den külemi Pokhara, Nepal nung April 27 nü nungi tenzüka asayatsü.

Pragnya-i, taoba asayamung nung South Asian title asemenbuba atonga benogo aser pa tetsürtem overall category nung tekububa nung lir.

Maharashtra nungi asayar Sanjana Joshi aser Mansi Mohite nati taoba küm iba asayamung nung Pragnya

sülen silver aser bronze ngua liasü. Tenata iba asayamung nung asayatsü aliba tetsür asayar 13 rongnung densema lir.

Kasa mapang nung Muralidharan Sinimol, shiba taoba küm tasembuba jenjang nung tembang aser 2022 küm champion liasü pa-a tebur asayar 20 rongnung densema lir. Teburtem rongnung ano Manipur nungi Telheiba Soram aser Kshetrimayum Kabidash Singh nata densema lir.

Iba tetoktepa nung 750m tzü awaba, 20km cycling aser 5km asemtepa densema lir.

India nunger asayatem: Tebur: Telheiba Soram, Kshetrimayum Kabidash Singh, Tushar Deka, Anagh

Wankhade, Parth Sankhla, Angad Ingalekar, Abhishek Modanwal, Ankur Chahar, Parth Mirage, Krishiv Patel, Koushik Vinayak Malandkar, Sai Lohitaksh Kd, Dev Ambokar, Raj Kumar Pawar, Puskar Das, Vishwanath Yadav, Adarsh Muralidharan Nair Sinimol, Ankan Bhattacharjee, Arnab Bhattacharya, Safa Musthafa Sheick.

Tetsür: Durvisha Pawar, Dolly Devidas Patil, Dhriti Koujalgi, Rama Sonkar, Heny Zalavadiya, Prerana Sravan Kumar, Riddhi Kadam, Sanjana Joshi, Snehal Joshi, Mansi Mohite, Nafisa Millwala, Pragnya Mohan, Punam Biswas.

Narsingh Yadav Athletes' Commission mendenbuba kümogo



Rongchii/April 24, 2024 (Agencies): Taoba mapang Commonwealth Games gold-medallist Narsingh Pantham Yadav, Wrestling Federation of India's Athletes' Commission mendenbuba kümogo. Iba ajanga United World Wrestling (UWW)-i tuyuba mapa ka takok ngua inyakogo.

Menden tenet atema candidates ti liasü aser election agiba sülen züngsem tenet shima liasü. Iba sülen züngsemtemi commission

mendenbuba mapa abentsü atema Narsingh shima liasü.

2016 Olympics masaya tsüngda Narsingh ya osang kaket aika nung adoka liasü. Iba mapang Olympic medallist Sushil Kumar shiba yiruba ajanga qualification event nung masayatet aser pai Narsingh den trial bout ka asayatsü mepeshia liasü.

Sushil-i Delhi High Court nung ken o benok aser pai mepishiba magizükba sülenang Narsingh Rio Olympics nung asayatsü atema jangja liasü.

Ajisüaka Olympics metenzük tsüngda Narshinghi-i dope test ana tashi majangtet aser Court of Arbitration for Sport-i pa küm pezü atema tenokdangba agüja liasü. National Anti-Doping Agency (NADA)-ibo pa dope test ajangtetogo ta metetdaksü aser pa dope test ana majangtetba ya kuli raksatsüba ajanga lir ta

shia temepeshiba agüja liasü.

Athletes commission atema shimba tanga asayatem rongnung Sahil (Delhi), Smitha AS (Kerala), Bharti Bhaghei (UP), Khushboo S Pawar (Gujarat), Nikki (Haryana), aser Sweta Dubey (Bengal) nunger densema lir.

Alima nung wrestling asaya achaayangba lokti tentet United World Wrestling (UWW) puri WFI nem tenokdangba agütsür aliba agintsüba mapang Sanjay Singh-i aniba national federation dang asayatem tebilemstütem bentettsü atema athletes' commission ka amenoktsü tetuyuba agüja liasü.

Narsingh, ya Arjuna awardee aser Asian Championships gold medallist ka lir, pa 2012 küma London Olympic Games nung asayaogo, ajisüaka pa 74kg category nung mezüngbuba bout nung tsüka liasü.

India tetsür football team coach mapa abentsü Langam renema lir

Rongchii/April 24, 2024 (Agencies): Taoba mapang India team nungi asayar Langam Chaoba Devi, tetsür national football team coach mapa abentsü renema lir. I M Vijayan-i aniba AIFF technical committee-i Bodhbarnü iba mapa atema la tenüng benoka liasü.

Arishi küm 51 tain Devi, shiba Philippines nung 1999 Asian Championships asayaba mapang national team captain liasü, la ya taoba mapang India team assistant coach liasü. Manipur tsürla ya 1998 küm Bangkok Asian Games nunga linük tenüng nungi asayaogo.

"Ken o kanga junga asadangba sülen committee-i, India senior women's national team head coach mapa abentsü atema Langam Chaoba Devi tenüng benokogo," ta All India Football Federation (AIFF)-i ashi.

Tetsür tem rongnung north-east nungi Devi kijai AFC 'A' License coaching badge ngua lir.

La shimtsü atema benokba ya shimba den kasa dang lir, kechiyong AIFF executive committee-i taruba senden nung iba ya agizüktsü.

Vijayan lenisüba nung technical committee senden nung Pinky Bompal Magar, Shabbir Ali, Victor Amalraj, Santosh Singh, aser Climax Lawrence nungeria shilem agia liasü.

Senden nung AIFF Technical Director Syed Sabir Pasha-a densema liasü.

Committee-isa, Priya PV aser Ronibala Chanu na assistant aser goalkeeping coach asütsü benokogo.

Technical Committee benokba coach asemprongla ya taküm February ita Alanya, Turkey nung Turkish Women's Cup asayaba mapang team atema duty inyaka liasü.

Maneni Committee-isa, tebur U-16 aser U-19 team atema coach shimtsü asoshi sensaksemogo. Application tem asadangba sülen Committee-i item tenüngtem benokdangogo:

U16 Men's National Team Head Coach: Ishfaq Ahmed, Assistant Coach: Yan Cheng Law, Goalkeeping Coach: Mohammed Zakeer Hussain

U19 Men's National Team Head Coach: Ranjan Chaudhuri, Goalkeeping Coach: Sandip Nandy.

INDIA OSANG : Tapak 3 nungi...

Linük nung rara adokra PM khuret asütsü...

Modi-isa, "Tamalen parnok (Congress) sorkar nung aliba mapang parnok i, linük rongsen mezüngbuba temedenji Muslim nunger lir ta jembiogo. Iba tetezü rongsenji shirnok nem lema agütsütsü? Rongsenji tanur teimba alirtem nem lema agütsütsü. Ozüng alema arurtem nem lema agütsütsü.

Nenoki meranga aazükba senji ozüng alema arurtem nem agütsütsü asü? Nenoki ibaji agizükter asü?" ta asüngdanga liasü.

Ajisüaka Congress-ibo party manifesto nung yamaji tenangzükba kecha shia mali aser Hindu mesüra Muslim ta tetshia mali, ta metetdaksüogo.

BENDANGLI OSANG : Tapak 7 nungi...

Russia deputy defence minister Ivanov-i sübokrem...

ACF-isa, Ukraine nung Mariupol yimti yangluba mapang project balala ajanga pa ajangzükogo, ta ashi. Russia-i Ukraine amak tenzükba sülen iba yimti ya tangbo kanga mejungi raksar lir.

Moscow nung Basmany district court-i pa tepuokdak ita ana ayutsü atema obendang agütsüogo. Defence ministry indang facility tem yanglushiba mapang tangar den senteper ochi mashi inyakyim nung shilem agiba atema pa aija liasü.

Iba ken o nung pa aibelena aliba ngutetra pa tepuokdak küm 15 tashi ayutsü. Kasa mapang nung Sergei Borodin shiba Ivanov indang medemer lir, pa-a kasa ken o nung Moscow nung okadak nokdakogo.

Ivanov-i, Russia indang Investigative Committee-i pa aitsüba magizük. Pa ya article 290 Part 6 dak ajemdaker puogo, koba sübokrem rouble million a dak tema agi asütsü ta temulung melemi bilemba mapang benoker.

BILEM DANGANG

"Nai dangar temoatsü ngudaktsüra na kasa temoatsüji angur."